


Yakari Gabriel:

“Cada biaha cu bo ta cherche ora un otro hende wordo ofendi, bo ta contribui na normalisa abuso”

ORANJESTAD - Mi djis kier bo corda cu cada biaha bo haci chistenan racista pasobra bo ta haya nan ta super pret y bo ta comparti esakinan, bo no ta haci mas cu contribui na crea un sociedad cu ya caba ta mira tentamento manera algo normal.

Cada biaha cu bo wak un hende riba caya peña, of bisti na un manera cu abo ta haya ridiculo y bo ta pone esaki riba internet cu e intencion di laga tur hende burla mescos abo a haci. Bo ta pone mas enfasis riba con superficial sociedad a bira. Con mas bunita bo ta, mas bo ta wordo stima sin cu bo tin cu haci mucho mas. Nos ta keha cu



awendia niun hende ta worry mas cu locual un hende tin paden, pero tin ora sin sa nos mes ta contribui na e echo cu e pensamiento nan aki ta keda expande. Cu cada click, cada share, cada post, cada comentario cu nos ta comparti sin ta consciente.

Atake

Cada biaha cu bo ta ataca un persona pa cosnan of caracteristicanan na su fisico cu no ta den su poder pa cambia, bo ta pone mas forza tras di idealnan di beyesa cu ya caba tin mita mundo ta sinti mahos. Cada biaha bo cu ta tira un nacionalidad completo bou di un stereotipo bo no ta haci mas cu kibra e humanidad cu nos tur ta comparti. E ta pret awo, ta cruel y inhumano ta duna bo yen likes riba Facebook, hopi fanfaria, hopi siguido, (hende cu ta disfruta ta mes mediocre cu bo). Mi no ta pidi bo ta un santo, mi no ta bisa abo no hari, paso nos tur ta haya cosnan inapropia pret tin ora. Mi tambe tabata e hende aki, pa mi e no tabata importante ken mi ofende.

Pero mi a siña cu ora bo ta pone e cosnan aki bou di luz constantemente, nan ta haci hende dolor. Ora bo pone algo riba internet, e ta eterno. Algun dia



bo yiunan lo google bo nomber. Kico bo kier pa nan haya? Un tenta? Pakico bo kier hende corda bo? 13,14,15,16 ta edadnan dificil y nan ta pasa lihe, pero semper bo por scoge, semper. Ta cruel por ta "super cool" awo, pero algun dia bo lo lanta y realisa cu tin miho cosnan den bida cu haci otro dolor djis pa bo hari, chercha y crea fanfaria. Si nos no tuma responsabilidad pa cuminsa drecha e sociedad cu nos ta biba aden, niun hende ta bay haci esaki pa nos. □